

## 221 (CCLX)

1268 dicembre 15, Sarzanello (in castro Sarzane, in palacio domini episcopi)

Rollando, figlio del fu Enrico Blanco di Erberia, dona a Guglielmo, vescovo di Luni, beni e diritti a lui spettanti in Soleria, Moncigolo e Ceserano. La donazione è fatta per la rimessione dei peccati e per i danni inferti al vescovo quando Rollando era insieme a Bernabò Malaspina, nemico e persecutore della chiesa di Luni, e a Manfredi, principe di Taranto.

Copia [C] CP cc. 267v.- 268r., cc. CCXIIIv.- CCLXr. secondo la numerazione originale.

Edizione parziale in LUPO GENTILE 1912, n. 260, pp. 239-240 Nel margine esterno, di mano moderna: Soleria, Monciculo e Ciserano.

[1] In nomine Domini, amen. Anno a nativitate Eius millesimo CCLXVIII, indictione XI, XV die decembris. Dominus Rollandus quondam domini Henrici Blanci de Herberia, per se suosque heredes, donavit inrevocabiliter inter vivos venerabili patri domino Guillelmo, Dei gratia Lunensi episcopo, recipienti pro se suisque successoribus et nomine episcopatus, atque dedit, tradidit, cessit et obtulit eidem domino episcopo, pro anima sua et in remissionem peccatorum suorum et pro iniuriis atque dampnis datis et illatis ipsi domino episcopo vel Lunensi episcopatu super eo quod ipse dominus Rollandus adhesit olim domino Bernabo<sup>1</sup>, marchioni Malaspine, inimico et persecutori tunc Lunensis ecclesie contra ipsam ecclesiam et factori Manfredi, olim principis Tarentini, portionem suam sive partem sibi contingentem in Soleria, Monciculo et Ciserano atque districtibus et pertinentiis ipsorum locorum atque totum et quicquid habet vel ei competit, aliquo modo vel iure, in predictis locis in iurisdictione, dominio, hominibus, villanis seu vassallis, ambaxiariis seu ambaxiatoribus, redditibus, fictis et pensionibus, terris et possessionibus, agris et cultis, silvis et nemoribus, plenis et vacuis, divisis atque indivisis, aquis aquarumque discursibus, piscationibus atque venationibus atque aliis omnibus atque quibuscumque rebus ad ipsum dominum Rollandum quoquomodo spectantibus in dictis terris sive locis et villis et pertinentiis ipsorum locorum. Et dedit, tradidit, cessit atque mandavit idem dominus Rollandus eidem domino episcopo, recipienti ut dictum est, omne dominium, proprietatem, usum et utilitatem et omnia iura, actiones et rationes, utiles et directas, reales, personales et mixtas et omnes alias sibi competentes et competentia seu competitura in predictis omnibus et singulis vel eorum occasione, faciendo eundem dominum episcopum de predictis procuratorem et dominum ut in rem suam, ita ut ex hiis omnibus et singulis possit agere et experiri, tueri, causari et deffendere, suo proprio nomine directo et utiliter,

---

<sup>1</sup>Bernabo: *così nel testo.*

adversus quamcumque personam et locum et exinde facere quicquid voluerit, sine contradictione dicti domini **Rollandi** vel eius heredum seu alterius persone. Et dedit idem dominus **Rollandus** eidem domino episcopo licenciam, tenutam et possessionem corporalem vel quasi intrandi<sup>2</sup> de predictis, sua auctoritate, quandocumque voluerit, constituendo se pro eo et eius nomine possidere vel quasi donec tenutam et possessionem corporalem vel quasi de predictis fuerit introgressus. Hanc autem donationem, dationem et traditionem, datum seu cessionem et oblationem et omnia suprascripta et infrascripta dictus dominus **Rollandus** per se suosque heredes promisit et convenit eidem domino episcopo, recipienti pro se suisque successoribus vel cui dederit vel commiserit et nomine sui episcopatus, ratam seu ratum habere et tenere, attendere et observare et numquam in aliquo contra facere vel venire, de iure vel de facto, sub pena **CC librarum Ianuensium**; quam penam eidem domino episcopo vel suis successoribus dare et solvere promisit idem dominus **Rollandus** tociens quociens fuerit contraventum et pro quolibet capitulo non observato; et, pena soluta vel non, predicta omnia et singula in sua permaneant firmitate, obligando ad hec attendenda idem dominus **Rollandus** se suosque heredes et omnia sua bona mobilia, habita et habenda, retentis solomodo<sup>3</sup> fructibus et usufructibus omnium predictorum sibi in vita sua tantum ipse dominus **Rollandus** et renunciando omni iuri et legibus, quibus contra predicta vel aliquod predictorum posset facere vel venire, et specialiter legi que dicit donationem vel cessionem posse rescindi vel retractari per ingratitudinem vel alio quocumque modo.

[2] Actum in **castro Sarzanè**, in palacio predicti domini episcopi, presentibus Peregrino **canonico Lunensi**, Iacobino **archipresbytero de Amelia** et **Melanense Brixiolini**, cive **Lucano**, testibus ad hec rogatis.

[3] Ego **Petrus quondam Gualteroti de Soleria**, **sacri palatii notarius**, hiis interfui et rogatus hanc cartam scripsi.

---

<sup>2</sup>intrandi: *foro nella pergamena preesistente alla scrittura.*

<sup>3</sup>solomodo: *così nel testo.*